Homaidge en Gaston Brahier (24.10.14)

Gaston,

nom d'lai Fédération dés Patoisaints di Cainton di Jura, èt peus en mon nom, è m'aîbiât adjed'heû de te dire 2, 3 mots dains ci bé langaidge po l'quél t'és taint bèyie.

Dains nôt' Conchtituchion, en l'article 42, èl ât graiyenè çoci : « L'Cainton èt lés tieûmunes faint tot po voidgeaie, po enrétchi èt po botaie en aivaint l'paitrimoinne jurasssien, chutôt l'patois ».

Tot l'monde sait c'que t'és faît po mairtçhaie çoli dains nôt' Conchtituchion poéche que t'aivôs dje ouejè djâsaie en patois en lai Conchtituainte.

En ci temps-li, i étôs encoé djuenat èt i n'aivôs churment pe compris lés raicènnes de ton dichcoué. Poétchaint, li-d'dains, è yi é âtye qu'ât churment entrè èt peus qu'n'ât pus djmais rsouetchie. Ah, cobïn i aî préjie tés r'maîrtçhes po m'coridgie! Nian pe po m'faire dés rpreutches, nian pe po t'fotre de moi, mains cment ïn vrai raicodjaire: me coridgie po meus faire, me coridgie po meus djâsaie, me coridgie po meus m'faire è compâre lés biâtès di patois, sés chubtilitès, sés finainches...

Èl était en pieinne forme! An n'dit pe dïnche! An dit : È pâtait l'fûe!

Èt peus laivoù qu'an piaice lés pronoms dains ènne phrase? I veus **vos** édie. Ah nian Ugéne, an dit : I **vos** veus édie!

Djôsèt Barotchèt diait. « Nos sons lés patoisaints, ènne rotte de bons **vétiains...** » Toi, t'és graiyenè 2 rtieuyerats : « **Vétians** l'houre qu'ât li ». Ah, lo patois ç'ât bïn çoli : vétians l'houre qu'ât li ! Gaston, t'ainmôs lai vie. T'és meinme dit qu'te vlôs qu'ci djoué feuche ïn djoué d'féte ! Mon Dûe cment qu't'és bïn faît d'pâre tos cés bés môments èt chutôt d'lés paitaidgie d'aivô tés dgens èt tés aimis... Feuche raichurie Gaston tiaind qu'an ryéront tés rtieuyerats, nos s'raippeulrains tot c'que t'és faît po nôt' patois.

Dâli, i voérôs fini aivô c'que t'és graiyenè : « Tiaind qu'an on t'aivu lai tchaince de vni â monde èt de crâtre dains ci câre de tiere que djâse lo pailè d'nôs véyes dgens, nos sons tnis de tot faire po l'voidjaie... »

Èt peus i m'en voérôs de n'pe yére lo ptét mot qu'ât tchu lai feuye : Mon Dûe, è m'en encrât brâment qu'i n'feuche pe bïn daidroit po péssaie lo raigat de Ton Hôtâ. Que te dieuches empie âtçhe èt mon aîme sré dje eurvoiri.

En tés dgens, en tai fanne èt en tés 2 baichattes, i préseinte tot' més condoléainces. Èt peus en toi Gaston, i t'dis : eurpose dains ci ceimtére, dains cte tiere aidjolatte que t'ainmôs taint. Èt peus, cment qu'te n' peus pus me rpâre, échtiuse-me po lés fâtes qu'i aî faît...

L'Ugéne